

四庫全書

集部

欽定四庫全書

止齋集卷四十

宋 陳傅良 撰

序

奉詔擬進御製至尊壽皇聖帝聖政序

臣聞乾坤之文不著無以見太極而太極非有待於
文也虞夏之書不作無以見堯舜而堯舜非有蘄於
書也恭惟至尊壽皇聖帝以妙道治身參之三才而
無間以篤行事親質之六藝而無缺以深仁厚澤幸

斯世極之根荦鱗羽而無不被宜配雅頌宜龍衣春秋
而臨御二十八年之間凡施凡設歸美高廟金石之
刻無傳名山大川之藏未睹也夙以神器授于微身
盡遺有迹之累而退托無名之境方將淵乎其藏用
冲乎其忘言尚友太極法堯而蹈舜矣則聖政之書
何容心哉然而寶章玉冊希濶之典儲於三宮廟謨
宸斷溫厚之辭施於百辟而詠歌休盛摹寫功德之
人又徧天下至於中原之故老蠻貊之君長懷好音

歸大號者家有其說國有盟載也豈惟史臣將夫人能
記之豈惟今日將後世亦能記之則鋪陳彙次以作一
經蓋有孺子弗能抑聖父弗得辭者焉矧惟菲薄膺受
重寄蚤夜震懼何以嗣服對天之休亦越成書是訓是
式率舊因餘庶幾底乂是用申命大臣總領衆作起初
潛至於內禪掇其最凡得六百四十一條為五十卷一
言一動皆足以經天緯地垂裕無極猗歟盛哉昔者文
王演易周公繫辭父作子述臣竊慕焉於是親序此書

之意以附篇首上之慈庭副在禁中紹熙三年十二月
二日嗣皇帝臣謹序

進周禮說序

王道至於周備矣周之作誥曰上下勤恤惟曰我受天
命丕若有夏歷年式勿替有商歷年處心積慮蓋庶幾
無夏商之祚訖於暴秦略如其言是道也惟孔孟知之
孔子曰周監於二代郁郁乎文哉吾從周孟子亦曰周
公思無三王以施四事是故合族以五世自夏商用之

至周則繫之以姓而弗別雖百世而婚姻勿通諸侯以
五服自夏商用之至周九州之外猶以為夷服鎮服蕃
服世一見嗚呼脩矣後之傷今思古之士往往謂周文
弊學者尚論三代要當折衷於孔孟且夫天命之難諶
非兢畏不能有也人心之同然非惻怛不能懷也文武
成康積行累功之勤誠有見於此者讀書至刑人殺人
剗刑人君臣相勅甚敬甚懼服念誥教至於旬時至於
再三讀詩南雅羣臣嘉賓兄弟朋友故舊成役之際徒

一觴豆皆深致其好備禮盛樂以后妃之尊猶知以酒
醴勞慰行役僕馬辛苦夫苟燕樂之即詠歌嗟歎之不
足夫苟刑戮之即戰戰焉有憂色此非有利為之也畏
天命焉耳即人心焉耳嘗緣詩書之義以求文武周公
成康之心考其行事尚多見於周禮一書而傳者失之
見謂非古彼二鄭諸儒崎嶇章句窺測皆薄物細故而
建官分職關於盛衰二三大指悉晦弗著後學承誤轉
失其真漢魏而下號為興王頗采周禮亦無過輿服官

名緣飾淺事而王道缺焉盡廢恭惟本朝純用周政千
載一時爰自藝祖不忍役一夫之力而養禁旅不欲使
天下一吏得以專政而罷方鎮制度文為雖非周舊而
深仁厚澤意已獨至肆我列聖浸以寬大任子及於異
姓取士及於特奏養兵及於剩員甚者汙吏有叙復重
辟有奏裁論議之臣每不快此而國家世守重於更定
蓋周衰且千載而詩書之意於是焉在豈不盛哉熙寧
用事之臣經術外馭顧以周禮一書理財居半之說售

富強之術凡開基立國之道斷喪殆盡而天下日益多
故迄於靖康社稷邱墟生民塗炭老生宿儒發憤推咎
以是為用周禮之禍抵排不遺力幸以進士舉猶列於
學宮至論王道不行古不可復輒以熙寧嘗試之效藉
口則論著誠不得已也故有格君心正朝綱均國勢說
各四篇而為之序如此

嘉邸進讀藝祖通鑑節略序

本朝國書有日厯有實錄有正史有會要有勅令有御

集又有百司專行拍揮典故之類三朝以上又有寶訓而百家小說私史與士大夫行狀誌銘之類不可勝紀自李燾作續通鑑起建隆元年盡靖康元年而一代之書萃見於此可謂備矣然篇帙浩繁文字重併未為成書難以觀覽今略依漢司馬遷年表大事記溫公司馬光稽古錄與燾舉要撮取其要繫以年月其上譜將相大臣除罷而記其政事因革於下方夫學之為王者事非若書生務多而求博雖章句言語皆不忍捨也誠能

考大臣之除罷而識君子小人進退消長之際考政事之因革而識取士養民治軍理財之方其後治亂成敗效出於此斯足以成孝敬廣聰明矣故今所節略通鑑如羣臣奏疏與其他言行與一時誥令出於代言之臣苟非關於當年治道之大端即不抄錄或見於他書實係治體不可不聞而通鑑偶遺即據某書添入至於通鑑登載萬一有小小違誤亦略附著其說於下若夫列聖深仁厚澤垂裕後人傳之萬世尤當循守者必為之

論但存本指不加文采深有異於省察也

分韻送王德修詩序

右松風軒分韻送行詩十有四家趙容字叔靜翁珽字
處度魏謙光字益之王自中字道父徐誼字子宜項允
中字子謙陳直中字順剛潘雷煥字省之徐宏字蘊之
蔡幼學字行之潘霆字材叔潘倩字尚之張東野字孟
阜鄭志仁字能之子宜省之行之皆與德脩為同年進
士諸人或與久故或相識或不相識也能之與叔父伯

英字去華則以故龍圖先生嘗客德脩於宣城去華方
衰麻故不與分韻事林淵叔懿仲沈季豐儉夫後至別
自為詩予出韻亦不在分中吾鄉風俗敬客而敦師友每
一重客至某人主之鄰里鄉黨知客者必至不知客知
某人者亦至徃徃具觴豆登覽山水為樂間相和倡為
詩致殷勤或切磋言之於其別又以詩各道所由離合
懽惻之意真無相忘蓋其俗然久矣而未有盛於此會
者豈不以其人哉嗟夫吾見為此詩者多矣去十數年

復閱而問故焉則名字泯沒有不知今安在者幸不泯沒則流落困窮希得復合不泯沒不窮困時得復合而以勢利變故交不終者有之幸皆不至此然而道不行功業不著家人婦子抱其遺牘私相以為好而天下無考焉是皆可嘆也已余既賦詩又序諸君詩苟吾德修與凡在此者深知其可歎如此則余尚可因以不朽云

夏休井田譜序

謂周禮為非聖人之書者則以說之者之過嘗試之者

不得其傳也周禮說甚衆獨鄭氏學至今行於世鄭經
生志以為之傳焉耳於其說不合即出已見附會穿鑿
其舉而措之斯世可不可復古鄭慮不及此也故曰說
之者過自劉歆以其術售之新室民不聊生東都之興
服西魏之官制亦頗采周禮然徃徃抵牾至本朝熙寧
間荆公王安石又本之為青苗助役保甲之法士大夫
爭以為言安石謂俗儒不知古誼竟下其法爭不勝自
是百年天下始多故矣故曰嘗試之者不得其傳也以

是二者至非周禮此與因噎廢食者何異讀夏君休所著井田譜亦有志矣鄭氏井邑若畫基然蓋祖王制王制晚雜出漢文帝時以海內盡為九州州必方千里千里必為國二百一十其後班固食貨志亦謂井方一里八家各私田百畝公田十畝是為八百八十畝為廬舍蓋人二畝半云凡若此夏君皆不取漢以來諸儒鮮或知之者其說畿內廣成萬步謂之都不能成都謂之鄙雖不能鄙即成縣者與之為縣成甸者與之為甸至一

邱一邑盡然以其不能成都成鄙故謂之閒田以其不
可為軍為師而無所專係故謂之閒民鄉遂市官皆小
者無大者他亦上下相攝備其數不必具其員歲登下
民數於策損益之是謂相除之法皆通論也餘至纖至
悉雖泥於數度未必皆叶然其意要與時務合不為空
言去聖人遠周禮一經尚多三代經理遺迹世無覃思
之學顧以說者謬嘗試者復大謬乃欲一切駁盡為慊
苟得如井田譜與近時所傳林勛本政書者數十家各

致其說取其通如此者去其泥不通如彼者則周制可得而考矣周制可得而考則天下亦幾於理矣夏氏書成紹興間嘗上之朝已而流落久不顯吾友樓大防訪求得之於治永嘉之明年刊之郡齋大防博雅好古而知今吾所謂取其通者去其泥不通者蓋其人與則不但此一書而已也

丁端叔南征集序

端叔為中都官余以太學諸生識之別二十余年承乏

桂陽而端叔適守郴端叔誠少余三四歲然其宦達久
矣之官適同時由浙東西入湖嶺各行數千里至之日
皆以歲除是歲苦寒多雨雪每所次舍顧見妻子慄慄
無人色輒為之嘔噀無聊而端叔又將母起居飲食一
不得如在浙中時及讀南征集余浩然歎曰異哉端叔
之過人也先是治安豐以最聞直祕閣尋徙知盱眙
盱眙今要地非有氣力者不能得端叔闕以選得之何其
盛哉而竟徙郴亦左次矣余蓋晚得官自丞三山起家

為桂陽視同年進士最幸先達以余幸甚而之官時會
天苦寒常戚然於妻子意所不釋往往欲為詩輒語不
佳止而端叔官達早左次如此且將母適數千里外乃
所過山川仙隱之居皆為賦詩和平無咎言讀其詩知
其奉母夫人甚樂也至於忠憤悲壯亦皆有為而不自
其已出余不能知端叔蘊抱與當世公卿大人短長高
下如何以其遠過余以是為過人也端叔豈但是過余
哉桂陽蓋郴一舊縣每事稽郴而後行大抵郴令達四

境余方治文書模擬其後而又終不自滿余數數為賓客僚友言端叔才可任大官世未有知之者余知之顧言語不能動人雖然著之篇端以私相為好是則不得辭也

徐得之左氏國紀序

自荀悅袁宏以兩漢事編年為書謂之左氏體蓋不知左氏於是始矣昔夫子作春秋博極天下之史矣諸不在撥亂世反之正之科則不錄也左氏獨有見於經故

采史記次第之某國事若干某事書某事不書以發明
聖人筆削之旨云爾非直編年為一書也古者事言各
有史凡朝廷號令與其君臣相告語為一書今書是已
被之弦歌謂之樂章為一書今詩是已有可藏焉而官
府都鄙邦國習行之為一書今儀禮若周官之六典是
已自天子至大夫氏族傳序為一書若所謂帝繫書是
已而他星卜醫祝皆各為書至編年則必序事如春秋
三代而上僅可見者周譜他往往見野史竹書穆天子

傳之歟自夫子始以編年作經其筆削嚴矣左氏亦始

合事言

闕二字

與諸書之體依經以作傳附著年月下苟

不可以發明筆削之指則亦不錄也蓋其辭足以傳遠而無與於經誼則別為國語至夫子所見書左氏有不盡見又闕不敢為傳唯謹如此後作者顧以為一家史體而讀左氏者浸失其意見謂不釋經是書之存亡幾無損益於春秋故曰袁荀二子為之也由是言之徐子所為左氏國紀曷可少哉余讀國紀周平桓之際嘗有

事於四方其大若置曲沃伯為侯詩人美焉而經不著
師行非一役亦與王風刺詩合而特書伐鄭一事王子
頹之禍視帶為甚襄書而惠不書也學者誠得國紀伏
而讀之因其類居而稽之經某國事若干某事書某事
不書較然明矣於是致疑疑而思思則有得矣徐子殆
有功於左氏者也余苦不多見書然嘗見唐閱左氏史
與國紀畧同而無所論斷今國紀有所論斷矣余故不
復贊而道其有功於左氏者為之序

張園送客分韻詩序

右張園送客分韻詩為常信二史君作也士立朝則相推先去國即相懷不忍別此豈直私為好哉而關於當世之故矣蓋聞吉甫有大功於南征其來歸飲御之詩自謂及此者張仲孝友在焉爾逮其季至采蕭葛一日去君側凜然有三歲之懼周之盛衰余以是觀之石侯叔訪黃侯商伯同時丞太府皆以欲便私請於朝二三大臣輒留其章不上繇侍從下暨館學之士苟見諸公

亦輒止之曰奈何使兩賢去也而侯請益力蓋久之諸
公信以為靡他於是始言上上重其去為擇輔郡纔需
旬歲之次而叔訪得信州商伯得常州然合朝方憮然
不滿飲餞彌日相與咨嗟歎息也最後同院若同僚若
同年家又十人餞之張園兩侯之賢天下識之今其去
徒以欲便私無毫髮意不自得且旬歲間為善輔郡行
矣還闕可朝發夕至也視前時去者甚寵而同朝猶不
忍別如此嗟乎立今之朝不謂之遭時耶十人者曾稽

黃文叔清江彭子壽章茂獻永嘉薛象先蔡行之蜀范
文叔臨川曾無逸章貢李和卿東萊呂子約與余也會
張功父致地主之意亦分一韻余不獲在分中故為之
序

義役規約序

古者鄉田同井出入相友守望相助非其俗然也周官
之法四閭為族八閭為聯以役國事蓋有五家為比家人
至百人為率是四閭也其必以八閭為聯者役者半休者

半也役者給公事休者相與治其家事而又有羨卒有閒民以借助焉故其民相親睦而不病於役今天下上無橫斂下無繁征而民極困於保正長則以保甲催科之故也民不能堪雖叔伯兄弟相訟以避役久矣叔伯兄弟相訟以避役非其願相讎也勢使然也雖勢使然而非其願相讎之心不泯於是義役興焉義役非古也而有古人之意何也古者官以義帥民使之相親睦今也民以義奉官而私相親睦其政則殊其俗不可謂不

美也假如自一縣一州轉而推行之至於天下盡然則其俗益美假如上之人有變通養兵之道而僱役錢可還以予民則其政尤美故夫義役者未必非復古之漸也凡古之美事其初類自人心起耳吾都不過四五望族凡慶弔問報之事大抵相好而又家務為學人務省事其俗甚厚獨時以役訟失懽一旦會集割租以行仁義各以力厚薄無勉強不得已之色余故序其規式備道其善以勸其有終焉

謝李澤正事韻類序

始余見李澤於外舅張氏與諸丈人行論事不下氣於
州縣吏長短時事常否輒誦言之無歟則謂李澤但悻
直耳久之見其姻族急難不得李澤議不決議決矣而
用不足則或取其於李澤又久之州閭至委巷每事不
可無李澤藉其力者為多也李澤雖不愛其力至意小
不合即以語侵人或強隨和人意亦戲笑皆含譏誚初
不以吾有力自喜見毫髮德色而人亦諒其靡他不以

為怨余然後益知季澤孔子恥巧言令色足恭思魯狂士而惡鄉原蓋自周季士大夫貌勝而質衰氣卑而辨盛孔子亦既有感於此矣居今之世得見如斯人者吾固有取也嗚呼今亡矣此書季澤所著其家學長於詩禮頗欲有所論次未就僅及就此篇其於字學偏旁訓故學者易入焉季澤游學校登進士第調台州司戶高郵軍教授以勞績薦改秩知福州寧德縣未滿歲卒官不足行其志位不稱其才也韓昌黎嘗言註爾雅蟲

魚非磊落人歐陽公序韻總亦曰儒者莫暇精之其有精者往往不能乎其他余方悲季澤官不足行其志位不稱其才且懼後之人見此書如二公云云也於是道其平昔大槩序之篇端焉

謝懷英老子實錄序

懷英嘗為舉子知推尊孔氏矣已而脫儒冠去為道士以其推尊孔氏者尊老子於是為書若干卷自開闢以來凡老子名迹變化及其遺事言散見於百家撫拾詮

次無遺謂之實錄嗚呼何其專且博也則誠有功於道家者儒者筮仕即不得專志於書雖專志於書往往不暇崎嶇及世次年月也或有暇及此又不敢不務差擇則拘於六經而不得騁故吾夫子之道與天地相為無窮夫人推尊之願未有如懷英此書者向使懷英幸卒舊業不去為道士則此書將為孔氏作其有功何如哉雖然昔太史公嘗作孔子世家蓋有志於此矣說者反曰夫子之道與天地相為無窮且必與戰國若漢封君

較久長者則世家似不宜作孔氏之子孫輯所逮聞作
家語孔叢子二三書儒者亦弗甚稱道至獫羊楮矢稍
欲以夸大聖人又或以語神怪不取也然則使懷英幸
卒舊學不去為道士將為書尊孔氏則庶以六經斷百
氏必不得騁其博如此余是以歎息於懷英其不幸而
不得自託於孔子也夫其亦幸而得自託於老子也夫
故因以為序云懷英姓謝氏名守灝永嘉人余同舍生
也

送蕃叟弟超江西撫幹分韻詩引

蕃叟入江西幕同餞者十人林宗易自牧沈仲一徐一之朱穀叔及之黃敬之余兄莘叟分韻賦詩某亦在分中又為之引宗湛弟侍國風十五篇為別作者居大半道其所歷山川辛苦之狀僕馬之病而止於禮義古刪詩取焉騷人多怨誹自騷以降無譏焉爾若夫大雅之贈別則異於是吉甫作頌穆如清風仲山甫永懷以慰其心此所謂治世之音也十人者之詩雖工拙不必論

要皆歸於和平而無恨余是以占吾弟之將有所遭而并樂吾黨之能易其心而後語也是為序

孫子發微序

代陳順剛作

自六經之道散而諸子作蓋各有所長而知兵未有過孫子者春秋之季天下將趨於戰國矣故武之書多權謀儒者輒擯弗道間有好其書者又徃徃為之章句訓解夫兵事尚變而欲以訓詁求之不亦陋乎余自乾道乙酉不干有司之試端居深念今復歲矣蓋所觀六經

孔孟二氏之遺書由漢以來諸儒發明之者略備余未能有所增益間讀十三篇尚多餘意因以所聞於先君子與渡江諸將議論兵間事與已見推武之說附次其下嗟乎方天子明聖養晦於外而拱手讓中原者五六十年載矣士大夫懷安顧恥言兵然則余是書亦有為為之也

止齋集卷四十

欽定四庫全書

集部

北齋集卷四十一至

詳校官庶吉士_臣龍廷槐

主事_臣呂雲棟覆勘

覆校官主事_臣李駿

校對官中書_臣范鏊

謄錄監生_臣徐秉文

欽定四庫全書

止齋集卷四十一

宋 陳傅良 撰

題跋

宰臣以下跋御製至尊壽皇聖帝聖政序記
臣上言臣聞前聖之德業莫盛於堯舜後聖之述作
莫盛於孔子然二者相須而不能以同時恭惟至尊
壽皇聖帝道本於稽古功成於協帝臨御二十有八
年仁恩塞穹壤威聞懋蠻貊潤色中興之烈而增光

揖遜之美薄海內外萬口同辭以為自舜以來一人而已陛下奉若慈訓克昌丕緒見之行事緝熙光明而且欲以欽承允蹈之餘布在方冊昭示無極爰命史臣裒輯聖政鋪張表出作宋一經於是書成來上親灑宸翰攄發睿藻冠之篇端日星有爛著於天文而太極之妙自然陳露縉紳鈇槩之流又以為是孔氏之作也臣竊惟有虞之書初與五典並行而無辨更千五百年而得孔氏斷為書首序之百篇之上然後暴白於萬世由此

觀之虞舜雖極治嘗久晦而後彰孔子能祖述矣
蓋追誦而不相及未有父子兩朝聖以繼聖立德
立言自相發揮皇乎懿者如今日之盛者也抑臣
次舜之事以底豫於孝遭人倫之變也以予賢於公
因天命之改也惟我壽皇之事高廟脩及五福彌厯
三紀雍雍穆穆昭無間言曾未倦勤脫屣萬乘授之
主鬯神人燕寧累聖一家世世同德父子之間視舜
有光焉則陛下之序此書尤足以垂百王之範補六

藝之缺矣臣以非才待罪宰事適董攸司與托不朽而藏之禁嚴未寫琬琰無以對揚宏休臣實甚懼用是百拜稽首昧死請以賜本大書深刻以幸來世而又百拜稽首髣髴大旨敬書於序之下方太常丞兼國史日厯所編類聖政檢討官臣章穎著作佐郎臣王容臣李唐卿著作郎臣沈有開臣黃由秘書少監臣陳傅良左丞相兼提舉監修國史日厯提舉編類聖政

跋皇子嘉王賜贍金劄子

竊審抗章得請暫爾間佚啓行有期輒以白金百星
聊克贍儀輕浼為愧指留幸甚乍遠倍加保愛至祝
右紹熙甲寅五月四日潜邸所賜也臣是歲嘗覲對
上皇論事不合乞休致再不允於是又請對庶幾感悟
是日午鼓趨待漏院會從官趙彥逾以下亦同班奏事
閣門來約臣令隨衆班俄有旨獨令臣上殿下敷奏反
復久天意弗順遂再乞休致忽發玉音甚好甚好留下

文字臣就榻前謝且辭下殿再拜退出國門具以聖語
申尚書省諫院御史臺及奏知潛邸且請不獲稟達之
罪上賜贐金恩出意外臣以不才被遇最寵奎畫之號
視翊善黃裳有加是冬急召入講上數從容語臣所藏
朕字畫盍進來用寶如生辰詩何故久不見跋語臣每
逡巡不敢當尋復趣取跋稿僅成而臣罷去樓鑰高文
虎就觀臣家稿留案間家人倉皇不及收自入謫籍日
夜危懼但謹櫝藏不敢夸示一昭回之光以震耀天下

臣罪萬死言之感涕

跋御書所進嘉邸生辰詩

右傅良所上皇子大王生日詩王意嘉賞手書一本以贈或者難曰此頌體耳而及於阤危飢寒之辭何也曰是獨不見太史遷論頌乎太史遷曰余每讀虞書至於君臣相救惟幾是安而股肱不良萬事隳墮成王作頌推已懲艾悲彼家難可不謂戰戰恐懼善始善終者哉由此觀之虞周詩頌非耶知虞周之頌然後可與言詩

矣因著其語又見大王有取於詩在此而不在彼也且以著見王錄小善嘉規益之意傳良不勝感懼無以得此因刻之石以侈大貺

右此序跋真蹟久尋不獲故前跋賜金劄子深致歎惜之意而參政樓公復追記所見以紀之先生子師轍歲辛未二月始於故書中得之今附此

臣仰惟皇帝陛下龍潛嘉邸毓德進學一時官寮皆出遴選嘗逢誕節咸獻詩頌既而置酒高宴初

酌黃裳次酌陳傅良各出文書一通致謝再三及
視之其一曰上呈竊善其一曰上呈贊讀御名謹
封因敬請所以謙賜之由上曰二公之詩雖因為
壽而作皆寓警誨之意輒依所惠親書一本復以
為贈以示不忘裳與傅良跪謝而退龍飛之初擢
裳禮部尚書傅良中書舍人未幾裳以疾沒傅良
奏請以御書刊之堅珉玉音賜許是時臣鑰待罪
瑣闥與傅良同直北門嘗過其家傅良以跋語示

臣大畧曰季札觀樂歌頌而曰哀而不愁太史公
讀虞書至於君臣相敕惟是幾安未嘗不流涕也
成王作頌推已懲艾可不謂戰戰恐懼善始善終
者哉蓋頌不專於美盛德之形容皆有敕戒之義
秦斯以來此義殆絕臣為之聳然作而曰偉哉論
也自詩大序言以成功告於神明無有以頌為警
戒者舜臯賡歌世但以為盛事非司馬遷不足以
發聖賢相敕之旨自李斯頌秦專務溢美人亦不

以為過韓愈有曰不以頌而以規也而傅良能發之臣於傅良平日所畏至是益以歎服促使刊之傅良曰今既刊宸翰於上方不敢使人代書適有目青當堙小愈曾未信宿而已報罷未幾臣亦去國相忘於江湖者十餘年傅良下世訪遺稿於其家則不知所在矣二子師轍師朴求跋其下將碑之以傳遠臣既傷傅良不及見更化之日敢直書始末上以彰陛下好賢樂善之素下以侈傅良等

際遇之寵抑使後學知古人頌詩賡歌本非專於形容稱美而諷諫之切未嘗不寓於斯云

嘉定三年歲在庚午秋八月丙辰朔正

闕

兼太子賓客奉化郡開國公食邑三千六百戶臣樓鑰

跋歐王帖後

魯直帖往往有之如歐王二公帖蓋不多見靖康之變士大夫故家文物淪喪可勝道哉間見一二令人隕涕

歐公以嘉祐四年罷府事明年書成是歲王仲儀以侍
讀學士出知益州逢原遺腹女是生吳說傳朋傳朋嘗
通判永興以其母念逢原之墓乞改襄陽於是作養志
堂焉余悲逢原無後併著於此

跋徐薦伯詩集

世多謂書生不知兵謂書生不知兵猶言孫武不善屬
文耳今觀武書十三篇蓋與考工記穀梁子相上下吾
友徐薦伯登武舉第一日示余橫槊醉稿余讀已喜薦

伯慷慨有烈丈夫氣其詩詞視唐諸子矻矻弄篇章者多
哉當今諸公如見薦伯詩亦可解文武二途之惑

題杜大春畫梅

偶與文叔時亨論十五國風次第取季札舊序參孔氏
序時退秦於魏唐之後繫幽於末畧經改定而意以獨
至晚於燈下觀蜀客卿作梅筆墨無幾如在籬落因悟
萬事無支離法

題石時亨所藏呂真人畫像

他畫欲作塵外想類多輕揚今觀太清樓本儼若孔老
予微笑曰得之矣真人固應如此彼不知其人而求其
壽與他畫師何異

題張之望文卷後

劉知幾史通上下數千載間掇擊畧盡蓋剗然似庖丁
解牛手觸足履動中節會矣至不見金牛一節未識知
幾尚費若干年耶此事殆非強博能到

賈生太息一書首論諸侯王强大事可謂知務當是時

文帝方從代來齊楚諸王皆有相疑之勢朱虛侯功最隆及賞最晚帝意亦畧可見議者因謂賈生首編蓋干時云嗟夫生豈干時者耶要知論事誠有次第一舛其序必有不相察者

孔子作春秋一字無間然者非獨用功深也易其心而後語權衡自平耳後之秉筆者宜書輒不書不宜書輒書是其咎安在如班孟堅史視司馬子長加精察而竟不能過往往有愧色亦豈力不足歟

溫公嘗言洛中士大夫淵藪談空說性多矣惟史事無所啓口蓋有譏云耳然公言性獨與揚子雲合自今觀揚孰與孟子子雲博極羣書顧不見已何哉

程先生易傳未出門人亟以請先生曰吾獨不望進乎蓋晚始授人其間有一字數改定者前哲重著書如此顏子不貳過論殆是慚筆今讀韓子書者於斯文特熟甚科舉之累自韓子不免宜夫人盡然於此可以興古道不行之嘆

黃巖張君之望持所為書二編越江山來問當然與否
僕固辭張君固請僕末學耳豈足斷此書厚意不可虛
辱輒題數語附名篇末非敢云何姑以見惓惓意耳

跋趙主簿所藏詩後

丞相清源梁公治閩之數月徙福清主簿趙君餘慶丞
長溪主簿固辭丞相固遣之未幾福清宰李君宗思來
請主簿長溪宰李君遂夫又來請留主簿丞相益賢君
也速致郡中屬掌秋賦之入而趙君懇訴某老矣又位

所以廢且見子良之志子良學於東萊呂伯恭氏於余
為同年進士名善珎

跋史丞相祭諸葛夢叟文

夢叟言貌退然不自表出聲蹟不著丞相乃獨得之何
哉丞相門生故吏滿天下不聞有得此於丞相者夢叟
顧一見得之又何哉丞相之取人也異於今夢叟之取
於人也尤異於今矣不竟其逢令人隕涕

書種德堂因記陳仲孚問詩語

近讀古樂府始知後作者皆有所本至李謫仙絕出衆作真詩豪也然古詞務協律而尤未工仲孚嘗問詩工所從始余謂謝元暉杜子美云謝朓每篇堪諷詠蓋嘗得法於此耳解道澄江靜如練令人却憶謝元暉與子美同意因書種德堂遂記此語

跋靈潤廟賜敕額

桂陽之民雖貧而有常產父子孫兄弟多挨居或至百口重喪祭有喪哭泣過時必葬埋未有火化者逾久展

奉猶哭泣如新喪祭事謹潔至不敢糞瓜果尤耻為人
隸飢年不得已鬻子舍曰奴婢而以養子為約蓋其俗
朴近古然也然拙而惰農耕器絕苦窳犂必入土纔三
四寸終歲置田勿問及春耨去陳草曾不待破塊輒下
種水在田上節級溉注之是為良田水在田下雖咫尺
不能輓轆使之逆上往往夾江之田與並山同為瘠薄
易苦旱率十年八九耕不獲每旱即立視苗槁而乞哀
於神無問在不在祀典日擊羊豕聚羣巫鼓舞象龍或

燃指以膏火薄肉供佛類不効則禱於龍渡山之神山
在縣境內最著名其神邦人尊事之非已甚不敢輒禱
無不應今夏旱凡民之祠事且遍不雨於是屬軍教授
縣令謁祠下以靈潤源之水歸又兼旬不雨某遂宿戒
親謁祠下三鼓方作星河彌天行數里漸撼撼有聲鷄
初鳴至青蓮寺為位望拜遲明登山俄時雨大至達城
下已乃三日雨歲及下熟吏與民德侯之賜推本所始
得紹興十四年賜廟額敕黃一道於掌故仰惟國家為

民秩祀篤於報功宜詔萬世敬慕之石某為長吏不能
履阡陌為方略教民治田而徒干神之澤又以窮自歸
於當道連帥部使者咸以錢粟來周急可以免歲月矣
要不可久方將趣丞史以龍骨車若桔槔法下之鄉聚
使民稍自力不但以瀆神益永尊事無怠故因對神之
休與國家所以褒大之者并道其土俗善否為勸勵著
之下方

跋宋景文公帖

景文公以皇祐四年二月自毫徙成德明年正月徙定武實代魏公所謂丐任河朔一年有餘蓋是歲也元憲公亦以是歲八月自河南徙許而晏公來河南公有九月朔日請入覲書欲會元憲於河陽二十五日書所謂相國也至和元年劉冲之相劉自叅預即領唐書故催書於公嘉祐改元仁宗不豫其曰河朔大臣則韓公在相臺爾八月徙益州是時龐莊敏自永興改河東其年五月元憲歸綴中書門下班公有此月二十三日書云

云則猶在定武也三年王侍讀來成都於是還闕公言
莊敏引歸不決元憲乃圖任之漸明年莊敏以築堡事
罷節鉞元憲復筦樞務真見事之談云

跋晏元憲公表橐

景祐二年定新樂是時同在詞掖如胥公偃丁公度張
李晁石皆前進元憲公以元年四月掌制乃獨屬筆豈
非其文擅一時諸公所推遜歟欽誦遺稿令人起敬

跋趙延康公責偽楚書

余嘗手抄建炎四年八月二日刑部狀會恩牽復士大夫名數延康公在焉一時狀中如胡公寅劉公珏皆復用劉至位執政而延康竟謫死余聞京城之禍子昉以募義兵見囚范瑗世多言靖康無伏節之士有以宗室所暴白如此豈無人哉而皆誣陷於群小嗚呼悲夫

跋趙延康詩

余既於責僞楚書後著公行藏復見所為詩嗟乎劉歆李白之文盛矣其節操何如詩不足為公道也

跋溫公與邢和叔帖

熙寧間溫公居洛公從崇德縣再入崇文元豐四年兼
史事以所藏溫公帖知是時相與甚厚也後一百十有
二年某得見之於其曾孫遵仲修

跋張無盡與邢和叔帖

紹聖四年公為吏部侍郎十月自權尚書遷御史中丞
無盡此帖皆是歲無盡罷左司郎官去至是適兩年餘
矣

跋邢惇夫詩及諸公題

以諸公之愛惇夫與惇夫之得此於諸公追想在昔令人起敬

跋邢氏慶國夫人手書

余與天台謝傑景英為忘年交謝趙出也為余言外氏丞相家法甚悉今見邢氏趙夫人手書戒婦子一紙往往與景英語合邢尚書趙丞相事具國史至其故家典刑要自令人起敬

跋劉元城帖

余讀元城諫疏徧刺元祐大臣而獨不及司馬文正公徧刺元祐大臣而不以為訕獨不及司馬文正公而不以為黨豈惟諫議之賢哉亦足以想見元祐以前深厚之俗矣余懷此久因與子厚得公遺墨遂書其後

跋胡文定公帖

浙間人家家有春秋傳而罕見公字畫余記為兒時從鄉先生學同學數十兒兒各授程易胡春秋范唐鑑一

本是時三書所在未鋟板往往多手抄誦也晚官湖湘間每過士大夫家輒見公遺帖皆甚貴惜然為春秋學者顧少如浙間何哉因見向氏所藏帖書以勉之

止齋集卷四十一

欽定四庫全書

止齋集卷四十二

宋 陳傅良 撰

題跋

題仁皇所賜魏家刑政二字後

臣嘗幸備員中祕恭睹仁皇奎畫凡五十有五軸亦既盛矣以今見魏家刑政二字又以嘆散落人間夷夏山川之藏不知其幾也恭惟景祐以來上意日趨於寬任子至於及員郎治獄至於貸贓吏理財至於弛茶禁蓋

後來新法之士謂之失刑政者以今所見帝雖燕閒與疎遠小臣亦未嘗不講此二事然後知帝所謂刑政在是不在彼也嗚呼仁哉

跋蘇黃門論章子厚疏

余每讀章氏論役法劄子言溫公有愛君愛國之心而不知變通之術嘗嘆息於此使元祐君子不以人廢言特未知後事如何耳至讀黃門諫疏又未嘗不壯其決也

跋東坡與章子厚書

予來湘中見故家遺帖為多而有二異此書與趙潭州所藏黃門論章子厚罷樞密疏也諫疏在省中不知何年流落人間固可異此書傷觸大臣宜不為藏而亦存於今則尤異耳書作於元豐元年於是西方用兵後四十七年王蔡為燕山之役京師遂及於禍不仁而可與言則何亡國敗家之有信哉信哉又後六十七年永嘉陳傅良書

跋東坡桂酒頌

公之文宜作宋一經以傳無窮藏之名山副在京師顧
乃書桂酒法刻真羅浮鐵橋下以俟後之居夷者後公
百年徐思叔以所藏酒頌示余相對嘆息余性不善書
故不復贊

跋辛簡穆公書

簡穆公行藏見國史且天下能道之余不復道曩余守
桂陽歲旱流言往往以榔桂間民略死徙矣祐之時在

長沙幕府具以所聞言之故帥直徽猷閣潘公德鄺潘
公下其說兩郡蓋甚侵余與丁端叔也余二公頗恨然
忌幕府不敢白已而識祐之廼佳士耳余既相得會它
郡巡檢下軍人廩不繼屬祐之即其廬勞苦之天大寒
彌兩月雨雪沒馬股祐之崎嶇行盡闔郡得軍中人之
心以歸余方恨賢勞而祐之欣欣無一咎言以是益知
其人苟便於民雖極言不以為口過苟不便於身雖忘
言可也簡穆公為有後矣

跋江道士玉臺菴額後

道人為余言此山在閩昭武最深僻人不蹟處吾求晦翁之字請書於後將刻之石兩翁未必以功業著見於世或千載之下有得殘刻於荒榛亂石之間庶兩翁不泯耳余笑而書之

跋周伯壽畫貓

余家有數貓終日飽食相跳躑為戲而不捕鼠余恠而問人人曰貓之善捕鼠者日常睡因見伯壽所藏畫遂

書此語

跋徐夫人手寫佛經

余苦不學書自兒時及今所課書未嘗手抄一卷往時從常州先生薛士龍學每見抄書動十百卷竟帙無一字行草心嘆服之以為視司馬文正何如耳他人無及也今見蔡同年之母徐夫人手寫佛經九十五卷往往得唐人筆法則又愧焉字畫亦細以余之不能手抄一卷書至愧於徐夫人而或者輒意輕天下士余不敢也

跋司馬溫公遺玉壘聘君詩

熙寧元豐之間天下學士大夫稱溫公必曰老先生今見公所遺玉壘聘君詩方以是稱之則聘君之為人可知已嘉州君與李公擇同入館去之日熙寧六年三月父子行藏如此余頃見世所行官制舊典有三晉張縯一編慕用之廼今得聯事湘中聞其世又竦然起敬也

跋宋信翁產經

宋永壽信翁隱士也有過客為余道其人物色得之蕭

寺中而信翁亦肯來過余宋伯華伯潛兄弟衡陽賢者也一日見信翁於余座上驚嘆至未幾何從致此人耶已而與信翁意思洽雖有它客亦強之與坐兒輩或解衣信翁初不苦辭明日訪之則隨舟下長沙矣余臨長沙年一見過余不敢留也它日行郡得疾倉黃還解伯華以告則信翁亟來日視醫藥及稍愈廼去以是益敬信翁蓋有道者信翁能說易論語及內經諸書其得處要約有詩篇余嘗欲作宋居士傳未果會刊所輯產論

遂書其後以其與余交者如此則其人可知矣

跋王恭簡諫草

余以公言次元祐紹聖之事蓋古所謂耆蔡之見者耶
嘗袖此藁謁范東叔東叔因出其所藏公奏議若干卷
大抵類此

跋曾文清詩詞後

余不及見文清公然獲從六卿原伯侍郎仲躬游甚久
憶在都下時文清夫人尚亡恙生日當為壽余與高炳

如博士請原伯修拜母之敬見諸婦各年六七十盛服
夾侍夫人出對客已而原伯帥婦及諸孫羅拜奉觴且
遍飲客乃罷故家孝敬之風可觀也今見文清往還兄
弟間詩詞又為之嘆

跋蔡京貶竄元符末上書人詔草及考定邪正
等

李路為余言此藁得之京没入官故紙篋中嗟乎方京
矯誣君父以欺天下允罔塞穹壤矣豈知遺藁在官所

斥賣之錄哉然自蔽罪攸貫而京佚罰竟死牖下春秋
誅首惡若攸貫尚足誅乎

跋蘓魏公百詠詩稿後

余嘗慕魏公之為人今見晚所自叙百詠遺稿非獨其
人品殊絕蓋其及見故老與師友淵源所漸盛矣余於
是知慶歷嘉祐之際人物之偉嗚呼城門之軌豈兩馬
之力哉自三經之學行士以師心自賢不能降以相從
而風俗日壞其流弊何可勝道追想前輩高山仰止龍

圖陳公諱從易曾胡田楊四公者諱公亮宿况偉也楊以慶歷八年曾田以皇祐三年胡以五年相繼為學士云

跋陳求仁所藏張無垢帖

世未有言無垢先生善作字者而筆勢如此令人起敬
嗚呼豈但字畫哉余嘗聞呂伯恭父云某從無垢學最
久見知愛最深至今亡矣念無以報獨時時戒學者無
徒誦世所行論語解以為無垢之學盡在是也始余與
伯恭父有為言之也今見求仁先大夫與往還書說論

語事甚悉蓋雍也以前無垢已恨早出餘所著未嘗示人無垢無多著書而論語解要非成書學者但尊信之以此窺見無垢宜伯恭云爾也則世之知無垢者何如哉余少時方省事無垢來為郡守聞見鄉人父老數百人以淫雨害稼訴郡無垢若不省然俄而駛足來索狀而數百人者皆以不滿解去狀亦不知安在矣旦日還鄉下自城以南達瑞安凡閘者堰者皆已決捕魚鱗筭筍凡可以梗水者亦已徹去不數日水落是歲大熟無

垢永嘉之政初非赫然有聲也而敏事若此則世之不知無垢者不但其問學也無垢擯斥流落道不為世用以死其不為人知者何可勝道余因求仁先大夫說論語事且有助於永嘉之政故併著之

跋葉正則所為陳仲石墓誌

某不善書強書此以慰吾仲石欲作數語附碑陰又無以出銘意之外者嗟乎仲石斯銘亦足以不朽矣銘作於淳熙而書於紹熙之癸丑故正則用前銜云

跋林宗大家藏湯氏畫梅

湯梅近稍不貴重於世余慮宗大藏之之悔也故為之書

跋雲山壽昌院右帖公據後

圖經云中和二年置與院牒合但不詳杜名字唐史元年十月賊朱褒陷溫州今牒稱樂境當在賊平之後然以寧海軍使繫銜攷之地志是時未有寧海軍也豈平賊時嘗暫置軍故略不書乎乾元元年始建靜海軍令

軍使錢者元瓘也蓋是歲從元瓘之請陞節度使耳雪
菴於今為前輩行余壯時從薛常州士龍學士龍數為
余言道雪菴為人由是定交直龍圖閣鄭景望將造朝
與余遊鴈山會天大雪行十數里訪師於深林叢莽中
三人相對清話從者無人色今老矣不欲領叢林以書
來別余且示院所藏故牘將待盡於此院余方屏居山
樊與士友絕不知與師後會復何時然各行其志會不
會何足道因書卷末以當別語

跋張魏公南軒四益箴

乾道之辛卯余送南軒先生於吳興之碧瀾堂雅聞定
叟尚書名而未之識也其後尚書公所至治行為天下
第一益相嚮往余守桂陽是歲孝宗內禪故事桂陽守
臣貢白金三十兩吏率取諸民以應令余懼非聖朝所
以惠遠民之意具以質言上擅減三分之二且不推賞
是時周益公當國疑不能決但批狀送版曹會定叟為
尚書奏桂陽壤地褊小守臣陳某請不妄得旨可其奏

而賞典視它郡余以是知魏公與南軒先生之教定叟
尚書能守其家法如此吾友沈仲一令余書四益碑後
遂著其事且以發明上恩云

跋朱宰元成所藏宋宣獻公王荊公帖

宣獻明道二年帖先是王文正公出守兗宣獻相繼請
上親政亦出守亳意此帖為文正發也荊公熙寧五年
帖運判中允者楊蟠公濟也公濟以是年十一月自光
祿丞改太子中允權發遣永興等路轉運判官明年司

農言近詔天下出錢免役而永興秦鳳比它路民貧役重於是始立二分寬饒之法以此帖考之當是荆公嘗有悔意故農寺敢白上耳餘詩帖不能詳其歲月良愧該洽

跋朱宰所藏竹石

余苦不識畫獨嘗得東坡先生竹石於司馬文正諸孫把玩久之略窺其意今見此圖筆勢殊逼坡仙愛賞不已於卷末得蔡子俊薛道祖二跋皆藏畫名家余幸偶

合爾

跋朱宰所藏孫介畫

孫介不見朱氏畫史孫廣明中避地入蜀長於天王鬼神筆力狂怪不以傅彩為工此畫亦然介豈其家學耶

跋林伯順七世祖畫像

陳子曰自元豐季年至今故家舊物希不失矣而吾友林大備所藏七世祖像見之面如生真家寶也公諱頌字雅文薛寺丞先生銘大備父嘗識之序引中公起家

累數鉅萬而不及仕今衣冠蓋貌工尊大之云

跋謝大成所藏曹公顯墨跡

高宗中興一時元從皆將相也公顯獨善避權勢以眉
壽終今觀所遺謝大成雜語一紙豈偶然哉豈偶然哉
大成與余同年生而强健過余薄物細故身親不倦亦
必有得於此矣

跋姚次韓所藏其祖闢修禮書堂帖後

余嘗論前朝應制書若竇儀蘓曉同定刑統而世但稱

可象司馬光趙彥若同上百官公卿表而世但稱君實
蘓洵姚闢同修太常因華禮而世但稱明允之類歲月
浸久將失其傳令人太息今三館書目言百官表為溫
公撰是已鉛槧尚多湮晦況於事業尤可嘆息如研論
事物顧據於口耳之傳其然豈其然乎因姚公孫次韓
出示堂帖遂書其後

跋黃元章所藏山谷墨蹟後

以余所見士大夫家山谷墨蹟皆可寶獨衡州守鄭如

富醴陵丞李九齡與今元章所藏迺其家世舊物然後
知得之它人與魯納部鼎何異自百餘年間故家三世
希不失者而元章凜凜有論新法意象又不但家藏如
此

跋吳興陳錢芝草圖

頃桂陽解中柱去礎三四尺所出芝一本婦子不以為
祥掇視余蓋恍然嘆芝不遭也明日故枿復吐三葉紫
質黃緣飾見之奇甚余雖異之但令婦子輩謹視毋掇

取逾時色爛然不敗今觀陳君繪芝為卷自內相李公
宗伯倪公序且頌其所自來不虛得又追嘆曩所產芝
非特婦子不好事雖余亦不好事也世固有尤物要其
名字出不出顧所遭何如人耳芝嘗遭嘆武宣者如余
安足道哉因題陳君卷後以自訟云

跋樓大防重屏圖

右重屏圖其一圖繭然衰疾人也識者以詩知其為自
傳無疑其一圖衣冠容貌皆甚偉必王公大人而莫知

之者王君明清濁以所嘗見廬山祠堂其夜並圖書像
謂其二人為李中主韓熙載更二人亦不知為誰也嗟
乎名字之著不著如此哉孔子所論伯夷叔齊齊景公
萬世不可易矣

跋孟蜀王書後

余讀漢文賜南粵王趙佗書知西都之所以興也周世
宗一世英主而昶以偏方通上國方哆然自大其語多
諷刺不遜其能免乎後而蜀亡諸君子顧以文詞取之

何哉

止齋集卷四十二

欽定四庫全書

止齋集卷四十三

宋 陳傅良 撰

策問十四首

問以文詞取士而病其不以實學應科難矣唐之科目繁密已甚然兼采譽望不專決於一日之藝猶少近古國朝雖視唐制加詳而祖宗盛時蓋有自藩邸熟聞其人已迺定為進士第一而大名舉子尚以德行自相推先國子監嘗遺進士有司尋復懷賦上殿詔特取試禮

部蓋有唐之遺風焉賢公卿大夫率於是乎得之粵自一切任法而緊以繩尺之文雖有茂材異等語不中程輒弗第錄繇是場屋始以綴輯揉熟淫靡之文相師而士氣日卑議者病之逮以時務發策以求實學要之不離於文詞胡能相遠周漢之制誠不可卒復伊欲尋祖宗之美稍寬學校貢舉之法以漸復唐舊宜不甚難施行而難者咸曰世闕益薄人益不足信將以私意撓公道不備法而後可夫自鄉貢不得以待闕官考試日者

銓選又增委保之員而國之貴游子弟將置別頭若是亦已察矣於今士風何所損益諸君其各誦所聞焉

問議臣以太學補諸生羣試者動以萬計故改制以約之以天下間歲舉子之數百取三焉謂之待補蓋其嚴如此而邇臣之請迺欲博訪勲賢之後淪於編戶者皆得附試胄監如國子生夫均之為士也禁其為舉子者而開其為國子者何哉且禁其為舉子者固曰將以抑競進也以今閩浙諸郡誠不可不抑然往歲邊郡復言

二廣之士率二十餘年赴春官者累數千人而上第者不能以十數方欲尋漢故事以戶口率別路以考之以示優異夫均之為舉子也既抑內郡復於外郡加優焉何哉開其為國子者固曰將以勸世族也欲其知學誠不可不勸然近制自在京釐務官不得以總麻親附監試甚者雖公卿大臣去國逾月則子弟不得補國子生夫均之為國子也在於昔寬之而今者顧吝嗇又何哉上方嘉與寓內之士共成治功而有司選舉之說不勝

異意且均一之政何所彼此苟無旌別必且猥并二者之論未知折衷諸君其切瑳究之庶有合焉

問漢兵制皆秦制也自遷固諸史云爾夫漁陽之事秦效亦可觀矣而終漢無驕卒之患何歟將隄防之禁特密歟田家子至不識尺籍五符而發諸侯兵或有非虎符驗者其隄防果有以過乎秦否也或者繇戍之法簡以便歟以淮南地遠往來中都者甚苦西北邊郡五尺以上不得休息吾未見其簡且便迺若是然也不然則

餽餉足而賞賚之優歟塞卒乏糧戰士無祿上功幕府
輒見繩於文吏蓋當時已病之矣又不然則士安於將
素有以撫循之歟觀漢諸將大抵臨事輒置不聞其兵
久隸焉者也抑有甚惑焉宰相之子不免戍邊而故二
千石將軍都尉猶給軍賦亦甚亡等矣而士大夫不以
觖望又何也積是數者非制之得然則果秦制也而成
敗異變豈獨幸然耶不惟士然凡漢置將奪之軍可也
廢之可也累功不封可也甚者誅放而卒莫敢握兵於

境負固以要上何因而得此不惟邊將自京師南北軍
詣城門兵屯一時典領位尊寵渥幾震主之威而亟拜
亟罷無一人愠恚裴回而吝權者又何道以馭之歟蓋
聞光武之興罷都隸升尉職削功臣之權而省材官騎
士不置所以為兵慮詳矣東都顧竟以兵斃無迺濶略
者善而二者拙耶方今養兵甚厚而屢驕將帥無顯功
徃徃富貴極矣而意不滿上思視漢有加焉而無其報
厥咎安在願與諸君商漢氏之得失而悉數之以推見

其明效據古馭今將於是乎取焉

問漢理財稱蕭相國而史佚其事夫巴蜀之饒武帝用之西南夷矣悉租賦不足以更費至以都內錢續之均巴蜀也而相國以饒東郡數年無乏事關輔流民往往就食其中其計果安出歟然尚有可解者曰武帝遠輸耗耳諸葛武侯又用之關隴出師曾不過武功木牛流馬之智工矣而轉輸輒不繼夫以相國視武侯未能遠過而武侯迺若此其缺安在方漢初定大啟九國居天下

大半各擅其賦天子所自有僅十五郡列侯公主頗邑
其中自山澤之租各自爲私奉養外纔十五稅一耳而
治宮室建城闕講朝儀調兵山東無虛歲迄無經費之
慮武宣以來諸侯之地亡慮多削入漢一日省酎奪侯
者百餘國大者至三四萬戶賦入視曩時絕遠甚而用
力益勞征算日益繁亦必有故矣元狩元封之間天下
蓋多事矣始元以來號稱富實宣帝蓋英主也一時司
農又善爲計而西羌之役大司農錢輒不贍於用甚者

請糴邊穀百萬斛不能具何直若是廩廩也方今版圖
西奄岷豕巴蜀之饒自若也北界淮濱嶠漢之陽東薄
於海南亘番禺所謂九國之略又十有六七恭惟祖宗
盛時關河三邊宿兵迨五六十萬大抵倚辦東南為多
今戍邊之衆闕與河陝而東南所入視舊增羨計臣顧
以日月為憂蓋嘗推漢之所以羸縮而不得其故且於
今重有惑焉願悉陳之如欲曰得蕭相國者而後可又
似迂濶不切於事情者矣

問風俗與世汙隆其所由來蓋非歲月之故矣周漢之季可謂俗弊漢興經營四方日不暇給其教化未甚明其學校未甚興其公卿大臣多出戎行而學士經生相與講明者尚缺如也秦氏餘習曠然丕變高者光明碩大可以任重其次亦篤厚忠實烝烝不至於姦下迨眚庶莫不自愛重於犯法自唐衰及于五閏俗益大壞藝祖龍興曩時機變傾覆嗜利亡恥之風一旦銷磨無復存者文武遺烈可以燕及數世嗚呼盛矣以余論漢之

澤至於隴西士大夫以李氏爲愧而本朝之在人心者雖鐫工不肯附名黨錮之碑三代之盛庶幾焉夫以三代積累漸磨之功深矣顧成效若彼未聞以大敝積壞之餘曾不必世百年而興起若是易者是則何道歟豈所謂今古之異事半而功倍者歟誠若是聖天子當寧慨歎以善俗爲問十餘年于茲矣而未覩其變則其咎又安在歟諸君試跡前事以稽當今之故本末源流必有可指陳者矣

問以當世之治亂成敗考論古今之士畧可觀矣春秋
之季晏子在齊叔向在晉蘧伯玉在衛季札在吳皆賢
士大夫也然浮沉自愛無所能發明功名者申韓蘇張
蓋戰國傾覆之徒耳而富國強兵所試輒効此其故何
也漢自元成以來士習偷墮視東都節義有愧焉及觀
亡新之敗寇鄧耿賈之倫拳拳於漢卒復舊物三國鼎
分則散為曹吳之役者不可勝數其不忍捨漢者諸葛
亮數人而已是何節義成俗而識所嚮者滋寡也唐襲

八代之衰歷房杜姚宋不能救也詩至李杜文至韓柳
經術至啖趙庶幾乎古而唐闕衰矣內則朋黨外則藩
鎮皆一時之俊何沒沒也將所謂文與政通者非此之
謂歟宋興七十餘載百度修矣論卑氣弱儒士猶病之
及乎慶厯始以通經學古爲高救時行道爲賢犯顏納
說爲忠嗚呼盛矣然向者丁寇呂范之朋黨興而復熄
慶厯以後則朋黨遂熾而不可救而世故亦非向者之
觀矣豈論卑氣弱迺所以爲盛時耶有司惑焉願與諸

君訂之

問恭惟主上嘉與宇內之士共成茂功日者除吏不以
年勞不以等級庶幾學士大夫洒心自奮行有歷年而
齷齪守文之慮未易於是順考祖宗之憲

關二
字

流品不

著左右所以并包無容德意甚備士思所以報稱捨此
時尚安須耶仰惟前朝訓迪在位雖無察察旌別殊異
案其式程陟降抑揚厥有微旨願與諸君共紬繹焉以
備採擇迺者改秩有雙轉有細轉均之入寺丞監丞耳

或自大理或自衛尉均之入員郎耳或自屯田或自虞部於是有帶館職顧與試銜等者有以兩使職官顧與判司簿尉等者艱易不相絕也今將比而同之歟迺者循資或以四考或以五考或以七考蓋淹速有如此者今舉不以日月爲功歟迺者任子有銓銓有限年今得例從調歟迺者特奏進士蓋或隔郊然後官之攝官然後考第之矣今與正奏槩無所齟齬歟迺者堂後官流外雖有高爵位不過郡丞佐今皆可以踐清要歟迺者

以臧免叙復若員郎則自水部以轉與他官特間然今
清雜之庸若無罪然歟推本九重之意所以為是混一
流品并包無容蓋曰勸士焉耳有如一遵舊章清濁畢
見無乃非所以為勸歟但曰勸士毋以見清濁為也或
者非順考祖宗之成憲歟然則如之何而可

問古者詢民於射以進士由是而擇於澤試於官而得
為大夫若卿諸侯故禮樂修明而無敵於天下日者聖
天子深監文弊采擇議臣之奏爰詔進士乙科以上無

試之射文武官自五品人錫藶射於禁園稽之往古將
宜於今四方之士亦既靡然向風矣蓋聞射禮自漢而
下但曰朝儀具文云爾用之戰鬪往往屬諸羽林期門
材官騎士之倫是故升降揖遜野人莫之識欣飛射聲
之伎亦不於經生學士取也今也不閱於田不習於鄉
校而徒試之廷得無若具文然者如必曰閱於田習於
鄉校次第而後至則井牧鄉黨之廢久矣或曰雖難卒
行盍少近古故事陝西有弓箭手河北有弓箭社得古

寓兵遺意而取士無與焉宜舉行之頗依漢選六郡良
家子爲郎之制間歲大比以秀異者上之於春官春官
雜用今武舉法既射然後科第其文詞於是而試之廷
高者試補吏下者報罷其舉送若考試官亦頗依漢選
舉法有賞有罰若是則庶幾乎古或曰士文勝久矣必
且失業或曰民未知禮而閑於武事將有他患然則古
終不可復歟諸君幸相與圖所以稱明詔之意

問春秋以來楚之卿材晉不如也而越有君子六千人

東南蓋多士矣說者顧曰漢以豐沛功臣定天下唐初人物并汾居多熙朝慶歷元祐之盛大抵關洛諸公卓有聞焉而東南之士功業不槩見於世何歟吳中子弟荆楚劍客宣潤弩手班班見史籍皆天下勁兵處也薄置都尉九十而九江臨淮會稽丹陽豫章財各一尉且他復缺畧唐府兵六百三十餘所江淮兩道不過八九中朝義勇亦但取之關河三路夫苟欲強兵者必在西北豈其民亦不足用歟九州之險捨河渭則江漢淮海

矣而山林沮澤之多至荆揚而窮用武之國莫加焉竊
迹前事七國之秦楚三分之吳魏五閏之周唐成敗異
效迺若彼夫形勢抑豈獨弱歟自昔轉輸之富曰江淮
最而鹽也茗也香礬珠貝之屬也視田賦又數倍世所
謂財貨之淵者方今擅有之矣比年大農之用厯厯無
乏夫是數者之利自若也又何繇若是然歟儒者實知
務才之不競兵之不銳形勢之不及財用之不繼務孰
急此者而但曰勿講舉而咎之東南之故則何貴於儒

者孟子曰得百里之地而君之皆能以朝諸侯有天下
況以四海之半又況古人有用之如前所陳者矣豈曰
不可願諸君疏其方畧以告

問古者重戎事宜亡一闕而舟師不槩見於經何哉舫
人習水著於明堂月令之書而世所行太公六韜蓋有
水戰云然則古有之而失其傳耶案周制徒出於井馬
出於邱車出於甸旗鼓甲兵率賦民為之假令有舟師
豈徒無所取給歟而莫詳其制何也春秋之季東諸侯

亟用之矣伐兵之役楚舟以無政無功然則舟師宜亦有政明年闕掩以井牧之法治楚兵賦車籍馬而舟楫不與夫舟楫不出於井牧之賦將安出歟吳疆之役沙汭之役繼此累見豈其取辦於倉卒之間毆民而用之歟越之報吳也凡四萬五千人而習流二千耳越固澤國也而可以水戰僅乃及此若然吳越之民殆未必盡習歟夫舟無定賦士無素習安在其爲東南之長而類以得志何哉漢於邊郡置車騎水處置樓船各有員數

且算賦漢所以治庫兵車馬者也水處以樓船易車騎其亦以算錢充費歟否則未聞也案地理志廬江有樓船官今夫水處不但廬江郡而已也他郡不置而廬江獨設官意者度縣官錢治船艦於此歟博考諸傳則尋陽有船會稽有船博昌有船桂陽零陵豫章皆有船夫廬江獨設官而他郡類有之豈其非在官之船故無司存歟不出於官而調之民是亦所謂取辦倉卒間耳亦得有員數耶謂無員數也傳有之曰因南方樓船士二

十餘萬人以擊南粵而淮南之書亦有所謂樓船卒水
居者斯其爲有員數昭昭矣士有員數其船棧不以倉
卒辦也亦昭昭矣然則舟孰從而具士何如而役可得
而考歟中興以來材官騎士既罷而三郡棹卒四部黃
頭班班猶見豈尚沿西京之舊歟江左六朝舟師甚設
而制度缺畧不著梁史有公私船之稱大抵或官或民
初無所定陳之末載防戎船艦悉還都下江中至無一
隻以此推見誠無足云者至唐制府兵於樓船未有處

也然而荆襄總管兼統水陸鄂岳出討大關步艦亦必有法矣而兵志無傳焉抑又何哉方今江海要擊其備嚴矣間者有卒然之警猶調民艦以佐王旅漁賈無擬發之常州縣有乏興之遽一時趣督往往條理未彰或被其患伊欲以鄂渚之戍施之沿江自荆達揚許浦之戍推之沿海自吳達閩聯次比伍輯以軍政使之大小相維遠近相及而稽之周漢參之楚越按之梁唐之間靡有成憲且夫治船置卒多糜官錢胡能賸之一切科

民則有不忍僮曰國家暇時姑置勿講卒有檄發閩浙
騷然尚循舊貫財戍要津而氣勢不通無益攻守宜安
設施幸諸君察察陳之毋徒曰道德藩籬將安用此

問昔者大禹排淮決漢導三江定震澤而荆揚之患去
方今淮甸爲國藩籬震澤近在股肱郡言水利宜無先
焉蓋聞毗陵吳興之間淪為沮洳者皆故墟井聚落也
桑田積多征賦積減說者頗咎漕堤曰禹迹三江僅松
江存耳自堤作而江不足以瀉湖繇是歲患澇溢宜決

之便是說則然矣顧今行都北門堤居孔道芻糧銜艦
可以坐集他如商旅之湊傳之速使聘之便捨此闕無
由焉朝而亡堤數者夕告病矣如之何況沿堤以東放
于海斥往往桑麻沃懋利刺彌衆卒然隳壞怨讟交作
如之何往者范文正公欲疏諸浦以就松江之流蘇文
忠公欲立千橋以通漕堤之壅儻可行乎雖然當范公
時曾未有堤也殆不可與今同論若曰千橋橋成堤潰
則患在數年之後與在旦暮何異未見其可也或曰六

朝都建鄴運道不由京口蓋自破崗瀆入秦淮自淮入江而破崗之東下荆溪道今蘇湖二州間所謂下塘者可以徑度設若無堤漕將出此雖然曩時都建鄴惟便漕斯已耳今都臨安匪直為漕慮也假令萬一有疆場之事長堤七十八里真所謂枕席上過師者廢陸而川是內自阻而他患且如故又如之何關堽陂堰不可勝計卒難徧復其不可不復無過數處泗口可以趨廣陵渦口可以向六合肥口可以下合肥古人於是因田以

設險因農以置屯大抵安豐以東則有芍陂鹽城以西則有射陂其間斷流為阻則廬江有舒水龍舒有皖水巢有巢湖滁有滁水六合有瓦梁淮陰有白水塘皆用兵所逕也欲阻北道要無易此頗聞今茲豪右之家名田一畝占地數頃阨塞類有主名矣何從而得之強之而歸縣官耶必紛然其擾不忍強民則地勢不比民居不聯而可以屯田者未之有也或曰更以他地否則歸之直夫冒地以要公上倖民之利也為國而利倖民奚

以爲政若但曰官治陂堰俾民自耕土曠人稀終爲棄
壤然則又如之何而可鄧艾之迹杜預廢以成功何敬
洙復以貽患夫豈皆不足爲耶事有召禍法有起姦自
昔病之矣淮浙之間而水利不興焉何以為國徒利之
興一切不顧必有被其殃者願諸公切磋究之有司將
擇其中焉至若江漢以南蟠塚以東凡見於馬遷之書
班固之志桑欽之經何者所當修理科鎖條畫世所論
著若白氏之記六井曾鞏之叙鏡湖單鶚之論西浙何

者所當依用併幸毋畧

問仰惟本朝至仁宗盛大仁厚擬周成康而過漢文景也自德行言語政事文學極人物之成具在其時是何其盛哉蓋歷年過於文景之相繼而事業何止淳樸無他而已彼好治之心不宏如賈誼董仲舒為諸侯傅為博士無事功可述也仁宗朝士由一介恢振斯文卓然配古者四方相望而不世之賢能大用顯承與夫彙征于時衆矣慶歷間屢出手詔開天章閣銳然以天下事

責成大臣然後諸公奉行佐助不為無大功者而韓公
范公富公獨當建議又收用端闕增置諫臣中外議論
相應如明按察抑僥倖去冗食謹入官選將帥之類韓
公所疏非一至范富二公俱條當世急務如取士安邊
之要減任子革磨勘謹赦令厚農桑擇守宰易監司數
事而范富二公有所條相類而所條畫不同者又欲參
其所長大體三公所陳汲汲於進才能退不肖而去宿
弊也浸以施行矣而醜正者闕去之他日所以委寄二

府賜給筆札體貌不殊倉猝固或未足數而不自同於諸生對策者其歸而條上亦有可言歟此其尤著者班班上下若近若疎所以為人才之盛皆可考也夫事有本末有名實有凡目而緩急細大係焉願以獨盛之日人物之盛所以有意太平或用或言者備陳之將以仰裨今日大有為之治毋易言也

問治亂廢興之故數千載間其既有聖賢之效者所不論矣自餘豈無渺然長思放言而太息者要皆謂成康

後無善治周孔遠無正學其志往往磅礴宇內而求一世之盡從吾說而不可得也然至今獨以孟氏為是其果然乎彼荀卿於制作之原富强之效視帝王六經所論無一不周揚雄雖不如荀之詳也如梲革斷鞠所以諄諄於唐虞成周云者意亦獨至自餘有師說家法者陳經制長策者俱非魏晉以下所可及王通謂可以再造彝倫而悲末世之荀道韓愈推孟氏之功不在禹下原道所言亦非他儒者能及之雖然愈則曰孟氏之死


不得其傳焉自是舉世同聲和之顧豈無人哉抑孟氏之名已尊而人不敢異議也果有所見哉此不可因人而言也本朝歐陽公之門學者方盛尤善論文學政事恥一事物不知泰山徂徠間則有行修經明學者所謂師表湖學胡公尤篤治道其學者多有才效號為學術尤備汝南周氏二程先生關中張氏以道學倡天下論學在當時遺言至今日世亦戶知之矣雖然成康周孔之後道術為天下裂治效泯然不知由起之故所謂渺

然長忠放言太息數世不過幾人而論議顧不復有如
孔孟之一藉彼荒唐之鳴長短之說如昔日之甚不知
學者何所取為不闕之證以敵異端歟今而曰伊雒云
也自周孔以來寧獨賢歟其間作者多矣若貌敬口是
因人之言則非學者矣彼其曰治國平天下物有先後
也致知格物云也篤恭而天下平也無實可議無證可
考夫作王制議大事儻幽冥而不知漢儒且深病之是
其所論尚未周歟雖然彼其考古今精矣而顧多論大

體何歟其有得於古今之精所以守經遭變者可得聞歟若是與孔孟之傳無一不相似也則委吾心布四體以求聖王之奧可也若不能自信終身悠悠於一二之見則如昔之作者皆罪之書不云乎九川滌原四海會同願歷考作者相與輸中心而講之母徒游言而已

問周官六典各有攸司而其間錯綜不齊若相輸而不相次何歟司馬兵官也宜凡夏官之屬皆介冑之士師田之役也今也司士掌羣臣之版正朝儀之位而隸於

司馬且夫掌羣臣之版與介冑之士不可以同僚也正
朝儀之位與師田之役不可以聯事也而周官顧合為
一無乃非其倫乎豈以為折衝俎豆不過闕庭之上乎
不然則必習於賓贊之儀而後可以治軍旅乎或者以
為是秦火之後簡編雜揉然也儻以為簡編之雜揉而
今制右選之士言事上閣殆有若周官之遺意則又未
可以咎秦火矣其推原古今設官分職之本詳著於篇



止齋集卷四十三

欽定四庫全書

集部

止齋集卷四十六

四至

詳校官庶吉士

臣

龍廷槐

主事

臣

呂雲棟覆勘

覆校官主事

臣

李

駿

校對官庶吉士

臣

嚴

福

謄錄監生

臣

東

瞻遜

欽定四庫全書

止齋集卷四十四

宋 陳傅良 撰

雜著

瑞安縣學上梁文

吾邑有學繇慶歷而來諸生置員於崇寧為盛久矣趨
廢誰其嗣興弛百役以獨先彌三時而具舉有嚴函丈
可以橫經於粲周廬可以肄業共惟聖考侈廟貌之前
觀顯允賢侯輯儒先之善美事關風俗歡動州閭斯抗

脩梁爰申善頌

東吳會修門一葦通璧海源源流道德也應泮水日
朝宗西峴首葱葱雨露低更上觀潮試回首朝陽合
有鳳凰棲南一曲清江與地叅驚世文章曾不露橫
塘居士府潭潭北閩粵群山來不極三峯之下可無
人能以功名留翰墨上閩闔方今開蕩蕩少微正照
斗牛墟此有隱淪誰與訪下七八十翁多在者自言
生不識干戈長得兒孫皆爾雅

伏願上梁之後群書充棟多士填門相維鬼神無風雨
漂搖之患燕及膚祚皆山河魁磊之英

到桂陽謁宣聖文

共惟夫子之言曰有一言而可以終身行之者其恕矣
乎某質薄氣拙誤有民社願事斯語以免於戾敢告

桂陽上元設醮青詞

迺者庶徵非常連陰不解爰方假守何以召和會王厯
之初頒雖修故事面天威之甚邇實貢忱辭恭願哀矜

一方嘉惠百穀事關民命寧使臣霑僥倖之恩咎在臣躬毋令民被阽危之患

桂陽中秋設醮青詞

疾痛呼天輒自忘其僭越高明覆物終不忍於顛隳永惟返風滅火之祥何啻虛谷應聲之速敢憑羽侶式謝鴻私恭願不異塵凡有來盥饗憐臣斗筭之器雖負民社而不勝念臣葵藿之誠益填溝壑而未已遂無它咎以迄終更

桂陽軍修城隍祝文

有屹崇墉爾神主之彼圯而闕宜崇補之築之闐闐尚
呵護之允也有成維皇其嘉與之

桂陽軍禱雨文

某假守於此大懼涼薄不足以

闕三字

用昭事明神以

祈歲事廼者烈風荐作嘉澤弗周

闕三字

禾且憔悴

夫為吏之日短神與民相依之日長奈何以吏之不德
而為斯民病也敬申前請敢告終惠

謝龍山渡明應侯文

維侯所宅杜陽之望風雨不時於是焉禱其諸古之所
謂境內名山川歟茲者嘉澤弗周烈風荐作菽粟幾空
禾且就槁固宰物者所以謫吏而侯亦豈遂忘此土也
遣官乞靈齋宿以俟侯不督過而辱霈施之某雖無以
愈人猶足以伐石撰詞昭示後來永永無忘

周子名說

周子請名余命之曰仍之蓋取古仍孫之義周氏之門

父子孫凡三世傳曰野人曰父母何莫焉都邑之士則知尊禰矣大夫及學士則知尊祖矣夫欲為士大夫者必世其家者也三姓之舊於今為庶畢萬匹夫也而大有後於晉國是在懋不懋而已故字之懋長

朱子名說

吾友朱同之之子名植字直卿

闕三字

名字所從來曰

祖父所命也欲易其字為直方而植

闕三字

因書以遺

之使持白祖父視如何也

謝居士贊

貧而好施隱而好客終身鰥居而義不廢嗣息豈其所
謂非儒非墨而自適其適者耶

自贊

以學多病以貧數窮佚我歲晏亦二者之功
闕三字歸
寥寥太空儻不離人即為良農

桂陽軍告諭百姓榜文

照會當職到任欲得民間通曉法意檢坐到見行條法

如右

父子律子孫違犯教令及供養有闕者徒二年

勅凡子孫違犯教令及供養有闕情重者隣州充惡者千里並編管

勅凡諸生子孫而棄之者徒二年殺者徒三年收生人共犯雖為從殺者與同罪棄者徒二年半並許人告若地分及隣保知而不告殺者徒一年棄者減一等

夫婦律諸妻無七出及義絕之狀而出之者徒一年半雖犯七出有三不去而去之者杖一百追還若犯惡疾及姦者不用此律

房族律諸同居若大功以上親及外祖父母外孫若孫之婦夫之兄弟及兄弟妻有罪相為隱部曲奴婢為主隱皆勿論即漏露其事及擿語消息亦不坐其小功以下相隱減凡人三等若犯謀叛以上者不用此律

律諸告周親尊長外祖父母夫之祖父母雖得實徒
其告重者減所告罪一等即誣告重者加所誣罪
三等告大功尊長各減一等小功緦麻減二等誣
告重者各加所誣罪一等即非相容隱被告者論
如律其相侵犯自理訴者聽

隣里

勅凡諸訐告之罪若於法不應告之人雖係廂耆隣
保亦不得告

勅凡諸事不干已輒告論者杖一百其所告之事各不得受理

律諸隣里被強盜及殺人告而不救助者杖一百聞而不救助者減一等力勢不能赴救者連告附近官司若不告者亦以不救助論其官司不即救助者徒一年竊盜者各減二等

窩藏櫃頭誘略

勅凡知人犯罪而藏匿過致資給令得隱避者不須

事發被追藏依匿罪人法其知情停止人犯徒以上罪者准此

律知情藏匿罪人若過致資給令得隱避者各減罪人罪一等

律諸博戲賭財物者各杖一百

舉博為例餘戲皆是贓重者各

依已分准盜論

輸者亦依已分為從坐

其停止主人及關力

若和合者各如之

勅諸開櫃坊停止賭博財物者隣州編管於出軍營

內停止者配本城並許人告廂者巡察看營闕宿

提舉人失覺察者杖八十

律諸略人略賣人

不和為略十歲以下雖和亦同略法

為奴婢者絞為

部曲者流三千里為妻妾子孫者徒三年

因而殺傷人者

同強盜法和誘者各減一等

勅諸略若和誘人因而取財及雇賣或得財者計入

已之贓

在一人名處類犯人不倍

畧人者以不持仗強盜論一

貫皆配千里婦人五百里編管因而姦者依強姦

法和誘者以不持仗竊盜論五貫配五百里婦人
隣州編管其知情引領牙保若藏匿被畧誘者各
依藏匿犯人法

右仰汝等百姓各詳立法之意欲汝慈孝父子有恩故
有供養有缺及違法教令及不舉子之法欲汝安錯夫
婦相保故有七出三不去之法欲汝和協宗族如一故
有相容隱不相告之法欲汝交通隣里無爭故有不得
告訐及相救助之法欲汝守已不務貪婪但利其家却

為衆害故有停藏開櫃誘畧之法廼至鬪毆姦盜每事有條意在禁汝為非勸汝為善當職今節取數項係父子夫婦房族隣里要切事理明以教諭汝等皆有良心其俗質朴比之諸處公事最稀若更遵從不致違戾雖有官府刑何所施更冀得力之家津遣子弟從師就學興起門戶其餘勤謹農桑愛惜錢穀祭享翁祖看守墳墓如此則骨肉相勸里巷無怨和氣所積天道不差風雨必調五穀必熟可使此邦永為樂土至如徭人實同

省地久來往還何分彼此設若軍縣催科或公人下鄉
恐嚇保社復相追擾或攬寄等家堯收過多或代納上
戶利息太重之類凡有枉塞並仰披陳當於當職自有
過差諸縣不能體恤儻以看望未欲興詞但希書簡相
投或因寄居學職過廳見諭庶幾通知從汝之便

桂陽軍告諭納稅榜文

照對軍縣每年起發省部總領諸司錢糧并支給官兵
錢糧貫萬浩瀚別無課入全藉稅戶夏秋銀錢分擘應

副當職到任據平陽縣丞狀申驅磨見得自淳熙十一年秋至十四年夏六料銀錢欠數不少除十一年已准赦文自第五等已下除放外餘四等以上并十一年夏至十四年夏三料理合拘催切慮稅戶不易難以一併了納當職今同衆官計度將十一年四等以上戶共欠一千二百八兩有零并十二年夏十二年秋共欠一千五百七十四兩有零共欠三料未納之數時暫住催自十三年夏料為始催理又慮稅戶日前已將錢米交托

與攬子店戶等人却被兜收入已致作名下掛欠已行
下知丞分鄉具出長名帖子付逐都保正戶長仰各巡
問甲甲內人戶如委曾交納託與人見有干照即仰保
正類聚姓名保明申縣切待於交攬人名下追理自餘
委係本戶即仰趁時赴軍輸納今立寬限十三年夏秋
二料限二月終十四年夏料限三月終更不准前遣官
差人下鄉搔擾乃已約束受納等處每銀一兩減五文
足指子錢減三文足役錢一百文足收會錢八十三文

足每一貫減五文足插子錢減三文足苗米官田職田
米每石減十二文足每石倉用米減十五升攬子米減
五升和糶米每石減七文足每石倉用米減十三升攬
子米減五升省義倉米每鈔減五文足每石倉用錢減
十三文足倉用米減二十二升省攬子減五升省銀自
一錢以上米自一斗以上准此曉示去訖候至限滿見
得錢物次第若是正稅自足了辦一年支遣當議再將
本縣久例無名科斂並行蠲減以便人戶若致限滿拖

延不肯了納仰本縣將欠數多人申軍點追別有行遣
桂陽軍勸農文

照對守令勸農國有常典循習之久但為空文當職以
里巷通曉之言勸諭汝等開具下項

一閩浙之土最是瘠薄必有鋤耜數番加以糞溉
方為良田此間不待施糞鋤耜亦希所種禾麥
自然秀茂則知其土膏腴勝如閩浙然閩浙上
田收米三石次等二石此間所收却無此數當

是人力不到子課遂減奉勸自今更加勤勉勿
為惰農坐視豐歉

一門房隣里切須和睦莫與爭訟界至田塍各據
永業火下牛畜迭相借助少有言氣且務休和
才到訟庭便妨日子況復般裹倍有勞費假如
有田十畝歲收不過十石供輸之外瞻養良難
豈宜因訟耗財自取狼狽

一了納租稅務在及時今來受納倉場並是當日

給鈔銷簿如有農家或將銀米憑托攬子鋪戶
等人須是便取去赤鈔為憑不可信受手會白
闕之類所慮攬鋪兜收過已致作掛欠正當農
務忽被追呼

一陂塘水利宜從古來上流下接公共分使若甲
家占吝害及乙丙群聚爭奪甚者到官期集隣
保追逮證佐動經旬月方得事明本欲獨得便
宜却被兩相妨廢

一生借種糧貧者不免先須量力莫據眼前借貸太多債還不易及至空窮却謀昏賴所是富家亦合量本收息除豁積欠難以遞年登帶恣為貪婪若貧者昏賴不還富者貪婪已甚日致興訟罪有所歸即非主客相資隣里相保之道

一此間典買產業或瞞昧卑幼或不儘問親隣或因抱種交業不時或因白與投印違限之類緣此無賴等輩執占爭論先自時種徑行收採比

至到官惟憑契約往往得產之家雖用見錢反以違法失理遭罪請自今遇有交易子細審度凡涉前項數端之類幸勿向前以貽後患

一此間多有無藉之人告人絕產及至到官或有恩養子孫承代或有吐退近親遺囑其初官司未知來由須至行遣甚者抄估比至給還動經年歲以此失業深屬可憐除已行下諸縣自今如有的是絕戶即仰都保連名結罪保明具申

方與受理自餘勿干涉人妄有告訴重行科斷
一諸縣夫遞除是般輦綱運錢米雖當忙月亦或
不免其餘雜役宜且暫停如官司差使重疊或
無輪次苦樂不均及承行等人取乞搔擾迺至
應干賦役有妨農蠶使汝失所並仰陳訴

右仰汝等遞相勸諭務在遵從庶克有年毋令後悔

止齋集卷四十四